

20 APR 1997

Hungary-Lawatan

PERDANA MENTERI HUNGARY LAWAT DATARAN LANG

LANGKAWI, 20 April (Bernama) -- Perdana Menteri Hungary Gyula Horn dan isterinya, Anna hari ini menghabiskan masa kira-kira sejam melawat Dataran Lang dan Taman Legenda di sini.

Beliau diiringi Timbalan Menteri Pertahanan Datuk Dr Abdullah Fadzil Che Wan selaku Menteri Pengiring dan Pengurus Besar Lembaga Pembangunan Langkawi (LADA) Datuk Haji Abdul Halil Abdul Mutalib.

Malam ini mereka akan diraikan pada majlis jamuan yang diberikan oleh kerajaan negeri.

Horn dan isterinya tiba di sini dari Singapura malam tadi untuk lawatan peribadi sebelum memulakan lawatan rasmi dua hari ke Malaysia bermula esok.

Esok, Horn akan diberikan sambutan rasmi di Dataran Parlimen di ibu negara sebelum menemui rakan sejawatannya Datuk Seri Dr Mahathir Mohamad.

Dr Mahathir dan Horn akan juga menyaksikan majlis menandatangani perjanjian mengenai kerjasama saintifik dan teknologi antara kedua-dua negara.

Dr Mahathir akan meraikan Horn pada satu majlis makan malam di kediaman rasminya di Sri Perdana.

Horn akan juga menghadap Yang di-Pertuan Agong Tuanku Ja'afar dan kemudian menghadiri taklimat di Jabatan Perdana Menteri.

Beliau juga dijadual melawat Menara Kuala Lumpur dan Menara Berkembar Petronas. -- BERNAMA

NH AKD